

sim ad earum radices jacent saxa, varia magnitudine tam affabre Spharica figura à natura efformati, ut globi artificis manu in majorum tormentorum usum tornati videantur. In quibus effractis inveniuntur serpentes saxei suis spiribus revoluti, sed qui plerique capitibus destituti. *Wilton* castrum quondam *Bulmerorum* inde conspicitur, & supra ad *Dobham* in Oceanum *Tesis* fl. se evolvit, cum plures rivus hospitio susceperit & novissime anonymum juxta *Yarum* mercatu suo notum, qui *Stokesley* irrigat emporium, quod ad inclytam familiam de *Eure* jam diu spectavit. Sub quibus *Wharleton* castrum quondam Baronum *Meinill* & *Harlsey* familiæ *Hothom*, nec non postea *Strangwaies*, cum vetustate jam colluctantur.

*Tesis* quod dixi ostium, navigantibus olim inspectum, jam tuta statio deprehenditur, & ad tutum accessum indicandum utraque in ripa Phari nostra memoria sunt constituta. Ad quartum ab hoc ostio milliare *Gisburgh* editius sedet, nunc exiguum oppidum, sed cui dum stetit, magna gloriæ fuit Monasterium perpulchrum & opulentum, quod à Roberto de *Brus* loci Domino circa annum Salutis MCXIX constructum fuit, commune sepulchrum nobilibus in hoc tractu, & Gualterum de *Hemingford* historicum non ineruditum produxit. Locus sane hic eximius & qui cum Puteolis Italiæ amœnitate, grata varietate, & raris naturæ dotibus contendat, quos tamen salubritate longe superat. Aer interjectu montium, qua mare hybernat, mollitur, solum fœcundum, gramine lætum magnam anni partem blandos flores effundit, venisque metallicis & terra aluminosa colore vario, sed præcipue ochræ & ferruginis, è qua alumen optimum & calchanthum excoquere jam incoeperunt, opulente abundat. Quod singulari solertia primus deprehendit ante paucos annos eruditus naturæ venator Cl. Eques auratus Tho. *Chaloner* (cujus curæ Britannia delicias Henricum Principem filium suum Rex noster maximus commisit) cum observasset folia arborum hic magis quam alibi subvirere, quercus late diffusas non altas radices agere, quibus plurimum roboris & parum succi, solum argillaceum, variisque coloribus, albicans scilicet, subflavum, & cæruleum nunquam gelu constringit, & nocte sublustri in semitis vitri instar emicare. *Ounsbery Topping* mons præceps & totus virens haud procul affurgit præalta specula longe spectabilis, qui & navigantibus pro indicio, & vicinis est pro prognostico: quoties enim culmen nube circumfunditur, plerunque pluvia subsequitur, è vasto saxo prope verticem fons oculis affectis salutaris effluit; & hinc gratissimo spectaculo valles reductæ, colles herbidi, prata virentia, pascua læta, arva frugifera, rivuli piscosi, portuolum *Tesis* fluminis ostium, littora aperta sine inundationis periculo, mareque velivolum despectantur.

*Kildale* huic subest, Perciorum Comitum Northumbriae castrum. Magisque ad Ortum *Danby*, quod à *Brus* etiam per *Thwengos* ad Barones *Latimeros* devenit, à quorum hærede nati fuerunt *Wilmington* Barones *Broke*. Verum hoc *Danby* cum aliis possessionibus *Nevillis* divenditum, è quibus Georgius *Nevill* ab Henrico Sexto ad Parliamenta nomine Domini *Latimer* inter Barones evocatus

*Britannia.*

fuit, in cujus sobole ad nostra usque tempora permanfit hæc dignitas. Nihil aliud est quod hic adnotem, nisi Baronem de *Meinill* nonnulla prædia hoc in agro de Archiepiscopis Cantuariensibus tenuisse, pro iisdem *Coigneros*, & *Strangwaies*, & alios, qui ab iis prognati sunt, ad obsequia, & servitia militaria Archiepiscopis præstanda astrictos esse. Cumque ex Prærogativa, *Rex Angliæ* (Prærogativæ verbis utor) *habebit custodiam omnium terrarum eorum, qui de ipso tenent in capite per servitium militare, de quibus ipsi tenentes fuerint seisciti in dominico suo ut de feodo, die quo obierunt, de quocunque tenuerint per hujusmodi servitium, dum tamen ipsi tenuerint de Rege aliquod tenementum ab antiquo de Corona, ad legitimam ætatem hæredis.* Excipiuntur tamen hæc feoda, & alia Archiepiscopi Cantuariensis, & Episcopi *Dunelmensis*, ita ut habeant hujusmodi terrarum custodiam, licet alibi tenuerint de Rege.

Interius ad montes de *Blackamore*, præter vagos rivulos & rapidos torrentes, qui passim convalles sibi vendicant, memorandum nihil occurrit, nisi *Pickering* Lancastræ patrimonii oppidum non parvum, colli adfixum & veteri castello munitum, ad quod plurimi circumfusi viculi spectant, unde vulgo *Pickering Lith*, *Libertas de Pickering*, & *Forresta de Pickering* (quam *Edmundo* filio juniore Lancastræ Comiti Rex *Henricus III* elargitus est) regio adjacens denominatur. In qua ad *Derventionem* *Atton* sita est, quæ nomen fecit præclaræ Equitum familiæ de *Atton* à Dominis de *Vesey* oriundæ, cujus hæreditas per filias inter *Edwardum* de *S. Iohn Everos*, & *Coigneros* partita. Ab *Edwardo* autem *S. Iohn* per filiam ad *Henr. Bromflet* magna portio devenit. Qui quidem *Henricus* vocatus est ad Comitiam Parliamentaria his conceptis verbis, quæ non alibi in Parliamentariis submonitionibus occurrunt, *Volumus & vos & hæredes vestros masculos de corpore vestro legitime exeuntes Barones de Vesey existere.* Postea per filiam titulus ille ad *Cliffordos* transivit. Ex altera parte ad quartum à *Pickering* milliare, juxta *Dow* rapidum fluvium, *Kirkby-Morside* non postremæ sortis mercatus quondam *Estotervillorum* possessio collibus adjacet, unde nomen impositum.

Post hæc ad solem Occidentem *Rhidall* substernitur, vallis læta, amœna, fœcunda, viginti tribus parochialibus ecclesiis ornata, quam *Rhie* fluvius interfecat: Locus, ut inquit *Newbrigenis*, *vasta solitudinis, & horroris*, priusquam *Gualterus Espec* Cluniacensibus monachis concesserat, & cœnobium fundarat. In hac *Elmesley* sedet, quod *Umetum* (si non mihi impono) *Beda* vocat, ubi *Robertus* ille de *Ross* dictus *Fursan* castrum construxit, juxta quod *Recall* fl. se sub terram condit. Inferius ipsi flumini *Riton* adlidet, antiquæ familiæ *Percibajorum*, qui *Percyes* vulgo vocantur, antiqua possessio. Inde *Rhius* multorum torrentum aquas secum in *Derventionem* evolvit, qui irrigat hæc in valle *Malton* forum frumento, equis, piscibus, & instrumentis rusticis celebratum, ubi veteris castri radices visuntur, quod olim (ut accipi) ad *Vescios*, amplissimos in his partibus Barones, spectavit. Horum stemma (ut ex Archivis regis constat) à *Guilielmo Tyson* deducitur, qui Dominus *Maltonæ* & *Alnwicki*, in Northumbria in prælio apud *Hastings* contra Normannos cecidit.

Eeeee Vnica

Historia  
Cantuar-  
rensis.

Præroga-  
tivæ Reg-  
17. Et. 2.

Ward-  
ship.

Blacka-  
more.

Pickering.

Atton.

27. H. 6.  
Bromflet  
Dominus  
Vesey.

Kirkby-  
Morside.

Rhidale.

Elmesley  
quæ etiam  
Hamlak.

Malton.